

cunia milites plus mille , quos ex Umbria & Piceno & Corfica prædæ atque stipendii spes evocaverat , ad eos qui Genua venerant milites adjunguntur : itaque spei bonæ plena civitas , suis sociorumque copiis ad Vicum , qui Pisanus appellatur , eratque in ipsius potestate , hostium equitatum cæde facta in fugam vertit captis compluribus . Milites , qui tunc ab equitibus tria millia passus aberant , cum suis præsto esse non possent , quod inter se , equitesque interpositum hostem videbant , ejus adventu non expectato , raptim temereque , quo cuique visum est , fuga comparata sibi met consuluerunt . Paucis autem post diebus eodem ex municipio emissos pabulatores , hostium est manus parva ex insidiis consecuta : ad quos cum ii qui erant in municipio , equites cataphracti sexaginta , leviter armati centum , milites minus trecenti , auxilio accurrissent , reliqui se hostes ostenderunt , impetumque in eos fecerunt , equites utriusque armaturæ quingenti quinquaginta , milites ad duo millia : illi se paulatim referentes , ad ejus loci pontem constiterunt , fortiterque pugnantes , cum aliquot ex suis amisissent , aliquot etiam capti essent , se tamen loco non movebant , vulneraque & cædes inferebant . quo in certamine Franciscus Siccus hostium præfectus accepto vulnere prælio excessit , pauloque post est mortuus . eo cedente finis est pugnae factus . atque illa quidem in pugna Veneti cum ad Lucium Malvetium Bononiensem Ludovici legatum , qui non longe aberat , misissent , uti sibi auxilio confestim veniret , prandere se prius velle respondit . Is , quod ex ejusmodi ludibrio responsi , nec allato celeriter auxilio , omnium se vocibus culpari sentiebat , honoris sui causa Pontem sacci castellum Florentinorum noctu adortus , scalisque ad murum positis cepit , cum tamen eo in castello esset Antonii Martiani filius adolescens cum equitibus cataphractis sexaginta , quorum pars in Lucii potestatem venit . atque illud quidem castellum Florentini decimo post die , quam est captum , iisdem prope artibus recuperaverunt , evestigioque diruerunt .